

Odgovor Goranu Simiću

Pjesnik za specijalne operacije i kabadahije iz PEN-ove kancelarije

"Zašto Sidran vapi da uđe u PENBiH nakon što je iz PEN-a samovoljno izašao?"; Oslobođenje, Pogledi, 5. jul/srpanj 2014. godine

Oslobođenje je pod gornjim naslovom, u prilogu Pogledi od 5. 7. 2014., objavilo tekst književnika Gorana Simića u kojemu se problematizuje moje djelovanje tokom opsade Sarajeva 1992-1995. godine. Originalna verzija toga teksta kružila je internetom pet dana prije objavljivanja u Oslobođenju i kod stotina, možda čak i hiljada internet-korisnika izazivala nevjericu i čuđenje, a svojim završetkom i zaprepaštenje: "Zajebao si se, Sidrane. Čini mi se da prilično dugo i nedostojno umireš. Uradi to književničko-muški da te pamtimo po stihovima a ne po zlu koje širiš svakog dana. Ti si jedini kojem to zlo ne smeta. Ionako si već pokojnik među onima koji vole čitati nekadašnjeg tebe. Među kojima sam i ja. Ja sam pisac sa malom zastavom u ruci. Ti si pisac sa velikom zastavom u ruci. Ne dozvoljavam da me prekriješ i zasjeniš tom zastavom toliko da se ne vidim."

Tu se autorskim potpisom završava verzija objavljena u Oslobođenju, a za svoj internetski auditorij i brojne prijatelje u njemu pjesnik nastavlja, dodajući desert:

"Jebem ti mater, Sidrane... molim te tuži me zbog ovoga. Opet, nakon što si mi stavio znak za odstrjel... i zbog čega moja djeca, rođena u Sarajevu, ne dolaze da se slučajno ne bi sreli s tobom. Da ponovim: mater ti jebem za svo zlo koje si mi učinio zadnjih 20 godina."

Ovo nije moguće razumjeti ako se ne zna sljedeće:

Na nadležnom sarajevskom Općinskom sudu nedavno je završeno suđenje/rasprava po mojoj tužbi protiv G. Simića za krivično djelo klevete. Optuženi građanin Simić tokom rasprave u više ročišta nije ponudio ni jedan jedini tekst, ni jednu jedinu rečenicu tužitelja A. Sidrana, tj. moju rečenicu, na kojoj bi se mogla zasnivati ili njome barem poduprijeti njegova javno izrečena tvrdnja (Slobodna Bosna, avgust 2012.) da sam ja, tj. tužitelj A. Sidran, u vrijeme opsade Sarajeva 1992/1995. godine, pisao i objavljivao tekstove 'koji su služili kao alibi za ubijanje sarajevskih Srba' (G. Simić). Takav tekst i takvu rečenicu nije ni bilo moguće podastrijeti, jer ni takva moja rečenica ni takav moj tekst ne posto-



je, niti su ikad postojali! Otuda je razumljiva nervoza s kojom građanin Simić iščekuje presudu čije je izricanje zakazano za mjesec avgust.

Zašto je onda dotična persona odlučila da ponovi svoje zlikovačke klevete? Zato što je dobila takav zadatak. Od koga je dobila takav zadatak? Od rukovodstva - vidljivog i nevidljivog rukovodstva PEN Centra BiH. To je ona grupa

književnih direktora, financijskih eksperata, akademika i akademkinja, predsjednika i potpredsjednika svega i svačega, koja je potpuno beznačajnog pjesnika Simića - nakon njegovog 17. godišnjeg izbivanja po kanadama i amerikama bijeloga svijeta - radosno primila u bratski penovski zagrljaj, uz uslov i obavezu koji se podrazumijeva: da u njihovom interesu, kad se ukaže potreba, 'odradi' pokoji prljav posao. (Uz prljave poslove moraju ići psovke, kao i šizofrene nebuloze po kojima je moguće da

osoba iz Bosne 'zadnjih dvadeset godina čini zlo' osobi koja 'zadnjih 17 godina živi na drugom kraju planete, u Kanadi!?)

Umjesto da ponude odgovore na javno postavljena pitanja o svome nezakonitom radu i drastičnom kršenju Statuta vlastite organizacije - a posljedica takvog ponašanja je dovođenje PEN Centra BiH u nelegalno, izvanpravno stanje - umjesto, dakle, da ponude odgovore na javno pos-

tavljena pitanja o kriminalnim izbornim prevarama, o pravljenu budala od vlastitih članova, o javašluku, o preziru prema javnosti i ignorisanju javnog interesa - kabadahije iz PEN-ove Kancelarije pred medijske reflektore isturaju lutke i papagaje, 'stoku sitnog zuba', s jednim jedinim ciljem: da se izbjegne i spriječi javni razgovor o suštini, o meritumu stvari, a meritum stvari je tragična činjenica da je piscima ove države, na prefrigan način, oteta najvažnija književna asocijacija - Internacionalni PEN Centar BiH!

Marioneta zvana Goran Simić je nalog svojih poslodavaca obavila onako kako je i sve drugo u svome životu obavljala: šlampavo i traljavo. Skromne pismenosti, oskudnoga znanja, tankoga obrazovanja i nikakvog talenta, marioneta je u svoj klevetnički tekst nadrobila svašta. Baš svašta. Nema na svijetu toga psa, niti na svijetu ima takvoga masla, s kojim bi to SVAŠTA taj pas progutao. Da bi se normalan čovjek ozbiljno bavio time, prethodno bi morao skrenuti s pameti.

Abdulah SIDRAN

Šaćir Filandra piše Oslobođenju

Dosta je laži o Fakultetu političkih nauka

"Bez zvanja i novca 626 studenata"; Oslobođenje, 14. jul/srpanj, 2014. godine

Magistarski studij po modelu 4+1 pokrenut je 2009/2010 godine s ciljem ispunjavanja potreba studenata za ovom vrstom edukacije i shodno opredjeljenosti Fakulteta političkih nauka Univerziteta u Sarajevu za pružanjem usluga slijedeći bolonjski koncept cjeloživotnog učenja. U procesu pokretanja navednog studija, dobijene su sve prethodne suglasnosti na nastavni plan i program studija od Nastavno-naučnog vijeća Fakulteta političkih nauka i Senata Univerziteta u Sarajevu koji su jedini kompetentni da ih donose i usvajaju, čime je potvrđena akademska neupitnost i dignitet magistarskog studija 4+1. Fakultet je u toku čekanja saglasnosti za pokretanje ovog studija od nadležnog kantonalnog Ministarstva započeo izvođenje studija, očekujući suglasnost, jer je već bila dobivena akademska suglasnost na Senatu Univerziteta u Sarajevu. Ovo je možda bio proceduralni propust, ali nikako sa predumišljajem što je u suštinskom smislu akademskih kompetencija marginalno. Naime, suglasnost je trebala stići prije početka zimskog semestra 2009., a nastava nije mogla čekati. Odgovornim radom nastavnika, te aktivnim i

predanim ispunjavanjem obaveza od strane studentica i studenata, magistarski program 4+1 (generacija 2009./10) stekao je reputaciju studija visoke akademske i znanstvene relevantnosti.

Studenti polaznici studija su sa Fakultetom političkih nauka potpisali ugovore kojima su prihvatili ponuđene uvjete studija 4+1 (koji uključuju cijenu studija i model studija: 4+1 sa 60 ECTS, i zvanje mr; Master of Arts - magistra struke), nakon čega je, u skladu sa svim zakonskim i akademskim normama i standardima studij izveden uz međusobno ispunjavanje obaveza obje ugovorene strane. Također, važno je napomenuti da Zakonodavac uopće nije predvidio mogućnost vertikalne promocije predbolonjskih studenata, pa niko od njih ne bi sa četiri godine studija mogao primjeru radi, upisati doktorski studij na Univerzitetu u Sarajevu bez sticanja 60 ECTS kredita kroz magistarske programe 4+1, koji se, kao tržišno orijentirani, organizuju na visokoškolskim ustanovama sukladno akademskoj autonomiji Univerziteta. Fakultet političkih nauka u tome nije izuzetak već dio široke porodice visokoškolskih



ustanova koje omogućuju širenje znanja i dobijanje dodatnih kompetencija za građanke i građane Bosne i Hercegovine.

Fakultet političkih nauka Univerziteta u Sarajevu je akademske 2011/2012, uz sve potrebne saglasnosti istog Ministarstva, pokrenuo istovjetan studij po istom nastavnom planu i programu i u okviru istog Zakona o visokom obrazovanju, i trenutno se izvodi nastava za novu generaciju studenata studija 4+1. Nadležno Ministarstvo je 30. maja 2012. godine u svojim Slu-

žbenim novinama br. 26, na strani 221., objavilo Spisak akademskih titula, naučnih i stručnih zvanja koje se mogu sticati na visokoškolskim ustanovama u Kantonu Sarajevo, a među njima se nalaze i zvanja sa diplomama koje su stečene na prvom navedenom studiju 4+1. Stečene diplome su time u akademskom smislu neupitne. Također, ne radi se o 626 studentica i studenata kako se preuveličava u medijima već o 333 studentice i studenta.

Fakultet političkih nauka Univerziteta u Sarajevu izražava žaljenje što je došlo do ovakvog slijeda događaja čija je medijska proizvodnja, spinovana od strane aktera koji su uključeni u pravni spor sa Fakultetom, imala namjeru da krajnje neodgovornom instrumentalizacijom i fabriciranjem nezavršenog sudskog spora naštetiti reputaciji Fakulteta kao ugledne članice Univerziteta u Sarajevu. Istovremeno želi se dovesti u pitanje i reputacija studentica i studenata koji su postigli zavidne rezultate na studiju i stekli i u akademskom i u pravnom smislu nespornu kvalifikaciju.

O neupitnosti diploma stečenih na ovom studiju svjedoči i sam zaključni tekst presude Kantonalnog suda u Sarajevu od 13. 5. 2014. godine kojom se jasno kaže: "Pri tome kada se ima u vidu da su naložene mjere (prvostepenim aktom) donijete u postupku inspekciskog nadzora provedenog dana 29. 9. 2010., donošenjem Odluke o usvajanju nastavnog plana i programa koje usvaja Nastavno-naučno vijeće tužitelja (Fakulteta) i Senat univerziteta (kojim se definišu i zvanja koja se stiču završetkom studija) i da je objava zvanja za sve studije 4+1 izvršena u Službenim novinama Kantona Sarajevo" broj 26/12, po proceduri Zakona o visokom obrazovanju, te je ovim tužitelj postupio po nalogu prvostepenog organa (iz tačke 1. prvostepenog rješenja od 7. 10. 2010.).

Fakultet političkih nauka Univerziteta u Sarajevu će svoju brižno njegovanu 50-godišnju reputaciju znati čuvati i razvijati te neće dozvoliti da bude žrtveno janje različitih političkih sukobljavanja, ambicija i namjera kojima se pokušava dati tzv. pravni smisao.

S poštovanjem,
Nastavnici, saradnici i
uposlenici Fakulteta političkih
nauka Univerziteta u Sarajevu